

GERARD DÉDEYAN. Les Arméniens entre Grecs, Musulmans et Croises. Etude sur les pouvoirs Arméniens dans le Proche-Orient Méditerranéen (1068-1150). Volume 1: Aux origines de l'Etat Cilicien: Philarete et les premiers Roubéniens; Volume 2: De l'Euphrate au Nil: Le réseau diasporique. Lisbonne 2003, 1511 p. (Bibliothèque arménologique de la fondation Calouste Gulbenkian).

ԺԵՐԱՐ ԴԵԴԵՅԱՆ. Հայերը հույների, մուսուլմանների և խաչակիրների միջև. հետազոտություն միջերկրածովյան Մերձավոր Արևելքի հայկական իշխանությունների (1068-1150) մասին: Հատոր Ա. Կիլիկյան պետության սկզբնավորումը. Փիլարտոսը և առաջին Ռուբինյանները: Հատոր Բ. Եփրատից մինչև Նեղոս. գաղութների ցանցը: Լիսաբոն, 2003, 1511 էջ (Գալուստ Գյուլբենկյան մատենաշարի հայագիտական գրադարան):

Հրապարակված երկհատոր աշխատանքը Մոնպելիե-Գ. Պոլ Վալերի համալսարանի պրոֆ. Ժերար Դեդեյանի դոկտորական ավարտաճառն է, որը պաշտպանության է դրվել 1990 թ. ապրիլին, Փարիզի 1 (Պանթեոն-Սորբոն) համալսարանում: Գիրքը հրապարակվել է Գալուստ Գյուլբենկյան հիմնադրամի հովանավորությամբ և կազմում է համանուն մատենաշարի հերթական հատորը: Հեղինակը գիրքը նվիրել է Սիրար-իի Տեր-Նեբրեսյանի, Կլոդ Կահենի և Ֆրեդերիկ Ֆեյլիի հիշատակին և ձոնել իր ընտանիքի անդամներին: Ժերար Դեդեյանն իր շնորհակալությունն է հայտնում համալսարանական ուսուցիչներին, Ֆրանսիայի, Հայաստանի և աշխարհի տարրեր երկրների բարեկամ հայագետներին, բյուզանդագետներին և միջնադարագետներին, որոնք աջակցել կամ իրենց խորհուրդներով օգնել են այս հսկայածավալ աշխատանքի կայացմանը (Հտ. 1, էջ VII-XV): Գրքի հանձնարարականը գրել է Ինստիտուտ-կաճառի անդամ Ժան Ռիշարը, որն անդադառնում է թեմայի կարևորությունը ԺԱԺԲ դր. Արևելյան Միջերկրականի, Բյուզանդիայի արևելյան քաղաքականության, խաչակրաց և մուսուլմանական արևելքի երկրների հետազոտության ժամանակակից խնդիրների տեսանկյունից (էջ XVII-XXI): Այնուհետև Ժ. Դեդեյանն անդադառնում է հատուկ անունների տառադարձության խնդիրներին, գրքի համար հիմք ընդունե-

լով Revue des Etudes Armeniennes-ի որդեգրած սկզբունքները (էջ XXIII-XXVI):

Նախաբանում մենագրության հեղինակը ներկայացնում է գրքի կառուցվածքը (էջ XXVII-XXX), իսկ առաջաբանում ընդհանուր գծերով անդադառնում Բյուզանդական կայսրության մեջ հայկական ազնվականության խաղաղած դերին, ցույց է տալիս, Արշակունիներից մինչև Բագրատունիների կործանումը, նախարարական համակարգի անցած ուղին (էջ XXXI-XLI):

Բուն հետազոտությունը բաղկացած է չորս մասից (էջ 1-1330), որին հետևում են գլխավոր ամփոփումը (էջ 1331-1338), մատենագիտությունը (էջ 1339-1417), ցանկերը (էջ 1419-1511), վերապահների ցանկը, տոհմածառերը և քարտեզները: Ժ. Դեդեյանն օգտագործել է ԵՊՀ-ի պրոֆ. Բաբեն Հարությունյանի և Վարդան Մխիթարյանի, ՀՀ ԳԱԱ արտասահմանյան անդամ Կլոդ-Արմեն Մուլթաֆյանի և Էրիկ վան Լո-վի կազմած քարտեզները:

Գրքի առաջին հատորն անվանված է Կիլիկյան պետության սկզբնավորությունը. Փիլարտոսը և առաջին Ռուբինյանները: Առաջին մասը բաժանված է չորս գլուխների (ա. Փիլարտոս Վրախամյան-Վահրամյանի ազդեցությունը և իշխանությունը, բ. Իշխանության տարածքային ձևաբերումները և բնակչությունը, գ. Իշխանության կառուցվածքը, դ. Փիլարտոսի պատերազմները), որոնք նվիրված են Փիլարտոս Վարա-

նունու Հիմնադրած պետական միավորման (1072-1090) պատմությանը (էջ 5-357): Առաջին գլխում հեղինակն անդրադառնում է Փիլարտոսից առաջ Վարաժնունի-Վրախամիոս ընտանիքի անդամների Հիշատակությունը դարաշրջանի կնիքների ու Հայկական, բյուզանդական, արաբական պատմագրության մեջ, այնուհետև իր ուշադրությունը սեռում է Նիկեփոր Փոկաս և Հովհաննես Ջալիկ բյուզանդական կայսրերին ժամանակակից Սահակ Վահրամյանի (969-978) գործունեության վրա (էջ 5-17), Փիլարտոսի իշխանությունը ծնող քաղկեդոնական միջավայրին, բյուզանդական բանակում նրա ծառայությանը և մասնակցությանը Մանազկերտի ճակատամարտին (էջ 17-35): Հեղինակն անդրադառնում է 1071 թ. առաջ Հյուսիսային Ասորիքում և Կիլիկիայում բյուզանդական կայսրության վարած քաղաքականությանը: Անտիոքի դուքսեր խաչատուրի և Պիստի գործունեությանը, մինչև Մանազկերտի ճակատամարտը Կիլիկիա թափանցած հայկական տարրին և սելջուկ հրոսակներին, բյուզանդական կայսրությանը Հայերի հավատարմության խնդրին (էջ 37-46): Ժ.Դեդեյանը հայադիտության մեջ առաջին անգամ անդրադառնում է Հայերի Ռոմանոս Դիոգենես կայսրին հավատարմության խնդրին, Մանազկերտի ճակատամարտից հետո խաչատուր զորահրամանատարի և կայսեր փոխհարաբերություններին: Գլխի հաջորդ մասը նվիրվում է Փիլարտոսի անկախ գործունեությանը (էջ 47-51), հեղինակն անդրադառնում է Միքայել է-ի դեմ նրա բարձրացրած ասպետամբությանը և ստեղծված քաղաքական միավորի վաստացի անկախությանը: «Փիլարտոսը տեսականորեն բյուզանդական ենթակայության ներքո» (էջ 52-61) հատվածում Ժ. Դեդեյանը քննարկում է Նիկեփոր Վոտանիատեսի հետ Փիլարտոսի համադորձակցությունը, իբրև Բյուզանդական կայսրության ստորակա Ալեքս Ա Կոմենենոսի հետ նրա փոխհարաբերություններին և կարգավիճակին: «Փիլարտոսը և գործույնյա մոսսուլմանների գերակայությունը» (էջ 61-64) գլխում հեղինակն անդրադառնում է թյուրք-սելջուկների հարկատուն և ապա ստորական դարձած

Փիլարտոսի վարքագծին: Գլխի վերջին հատվածում հեղինակը փորձում է պարզաբանել, թե արդյոք Փիլարտոսը բյուզանդական կողմնապահ է, թե՛ հայկական իշխան (էջ 65-70): Այստեղ հեղինակը կատարում է պատմագրության համար կարևոր հետևյալ եզրահանգումները՝ ըստ հայկական պատմագրական ավանդույթի, Փիլարտոսը Վարաժնունիների տոհմից է, իսկ ըստ բյուզանդականի՝ Վրախամյանների, ԺԱ դարի սկզբին ծնվել է Մարաշի մոտակայքում, Կոստանդին Ժ Դուկասի իշխանության ժամանակ բարձրացել է զինվորական աստիճաններով, Ռոմանոս Դիոգենեսի իշխանության տարիներին դարձել է Մելիտենի ստրատեգը և տարածաշրջանի մյուս հայազգի գործիչների (խաչատուր, Վասիլակես, Ապոկավակես) հետ մասնակցել Մանազկերտի ճակատամարտի պատրաստությանը, պարտությունից հետո ապստամբել է Միքայել է-ի դեմ, իսկ ավելի ուշ՝ ընդունել Մելիք շահի գերակայությունը, Բագրատունիներից հետո առաջին անգամ փորձ կատարելով վերականգնել Հայոց պետականությունը: Այս եզրակացությունների մեջ, իհարկե, մնում են դեռևս որոշ չլուսաբանված խնդիրներ: Ի՞նչ նպատակ էր հետապնդում մոսսուլմանության ընդունումը Փիլարտոս Վարաժնունու կողմից, և կամ ինչու՞ է Մատթեոս Ուռհայեցին այդքան թշնամանքով արտահայտվում նրա մասին¹:

Երկրորդ գլուխը նվիրված է Փիլարտոսի իշխանության տարածքային և էթնիկական խնդիրների լուսաբանությանը (էջ 77-178): Հեղինակն անդրադառնում է Մարաշի (Գերմանիկե) տարածքում հայ բնակչության գոյության և Փիլարտոսի պետության մեջ այդ քաղաքին վերապահված «սրբավայրի» դերին, Լիկանդոսի թեմի կառավարիչ Մլեհի (1072-1085) գործունեությանը, Կապադոկիա, Մելիտեն, Կոմագենե, Հանձիթ և Կիլիկիա գավառների ենթակայությանը Փիլարտոսի իշխանությանը և Կիպրոսի հետ ունեցած նրա փոխհարաբերություններին, Եդեսիայի նվաճմանը, Հյուսիսային Ասորիքում ծավալած նրա

¹ Տե՛ս Մատթեոս Ուռհայեցի, Ժամանակագրություն, Վաղարշապատ, 1898, էջ 206, 233-234:

գործունեությունը, Անտիոքի գուքս Վասակ Պաշլավունու ճակատագրին և Փիլարտոսի կողմից Հյուսիսային Ասորիքի մայրաքաղաքի նվաճմանը (1078): Հեղինակն անդրադառնում է նաև Փիլարտոսի իշխանության մեջ ընդգրկված տարածքների ռազմական ուժին և պաշտպանվածությանը, հայ (քաղկեդոնական և հակաքաղկեդոնական), ասորի (հակոբիկ և մելքիտ), հույն, վրացի, մուսուլման և լատին բնակչության խաղացած դերին, Ժ.ԺԱ. դդ. Հայաստանի և մերձակա երկրների էթնիկական և միջդավանական իրադրությունն ու տեղաշարժերին: Հիշատակված էթնոդավանական խնդիրների քննարկումը եզակի ամբողջականություն է տալիս գրախոսվող աշխատությանը, որը հավակնում է վերջին խոսք լինել հիշատակված խնդիրների հետազոտության բնագավառում:

Երրորդ գլուխը հեղինակը նվիրել է Փիլարտոսի իշխանության և բանակի կառուցվածքին (էջ 183-280): Նա այստեղ քննարկում է Փիլարտոսի իշխանության տակ անցած բյուզանդական այդ նախկին տարածքներում հայկական զինվորական ուժերի խաղացած դերը, նորմանների, ֆրանկ-խաչակիրների և մյուս ավարական զինվորական ուժերի ներկայությունը տարածաշրջանում, քաղկեդոնական հայերի՝ հատկապես Ապոկալիպ ընտանիքի գործունեությունը, իշխանության ֆինանսական ռեսուրսներին, Եդեսիայի և Անտիոքի քաղաքային իշխանություններին, Հակոբիկ և Հայոց առաքելական եկեղեցիների նկատմամբ Փիլարտոսի վարած երկմիտ ու երկակի քաղաքականությունը, Հայոց եկեղեցին քաջայող նրա գործունեության դեմ Գրիգոր Բ Վկայասեր և Բարսեղ Ա Անեցի կաթողիկոսների ծավալած երկարատև պայքարին, Փիլարտոսի դավանանքին և մուսուլմանությունը ընդունելու հանգամանքներին: Այս հարցերի հետ զուգահեռաբար, Ժ. Դեդեյանը քննարկման նյութ է դարձնում նաև Գրիգոր Բ Վկայասեր կաթողիկոսի գործունեությունը, քույր եկեղեցիների հետ փոխհարաբերությունները, Եդիպոսոսում ծավալած եկեղեցաքաղաքական-չինարարական աշխատանքը: Հիմնական շեշտը դնելով տարածաշրջանում Հայոց եկեղեցու դերի

բացահայտմանը, հեղինակը կարողանում է ամբողջականության մեջ ներկայացնել եկեղեցու և քաղաքական միավորների համագործակցությունը:

Չորրորդ գլուխը նվիրված է Փիլարտոս Վարաժնունու մղած պատերազմներին (էջ 287-357): Այստեղ հեղինակն անդրադառնում է Կասյադովկիայում և Հյուսիսային Ասորիքում հաստատված հայկական թագավորական և իշխանական ընտանիքների ներկայացուցիչների գործունեությանը, Փիլարտոսի և նրանց միջև փոխհարաբերություններին: Ժ. Դեդեյանը արժարժում է նաև հարևան մուսուլմանական քաղաքական միավորների և հատկապես Սելջուկյան Մեծ սուլթանության հետ Փիլարտոս Վարաժնունու փոխհարաբերությունները: Հայկական զինվորականության խաղացած դերը միջնադարում հայ պատմագրության բավարար ուշադրությունը չի արժանացել, այդ իսկ պատճառով կարևորվում են Ժ. Դեդեյանի մոտեցումները հիշատակված խնդիրներին:

Աշխատանքի երկրորդ մասը նվիրված է Կիլիկիայի Ռուբինյան իշխանության 1073-1145 թթ. պատմությանը և բաժանված է երեք գլուխների: Առաջին գլուխը նվիրված է Ռուբինյան իշխանության հիմնադրմանը (էջ 365-416): Հեղինակն անդրադառնում է Ռուբինյանների ծագման կնճռոտ հարցի լուսաբանմանը, որ բյուզանդական սկզբնաղբյուրների հենքի վրա կատարում է մի քանի ենթադրություններ, Ռուբինյանների հայրենիքն է համարում Հանձիթ գավառը: Այնուհետև սկզբնաղբյուրների տեղեկությունների վրա հիմնվելով, փորձում է ապացուցել, որ Կիլիկյան իշխանության իսկական հիմնադիրը Ռուբենի որդի Կոստանդինն է: Գազիկ Բ-ի և ապա Փիլարտոսի ստորակա Ռուբենի գործունեությանն անդրադառնալուց հետո, հետազոտողը ճշտում է Կոստանդին Ա-ի (1093-1100) իշխանության տարածքը, լուսաբանում բյուզանդացիների և թյուրքերի դեմ վարած նրա պատերազմները, ինչպես նաև բանակների հետ ունեցած առաջին փոխհարաբերությունները:

Կիլիկիայի հայկական իշխանության հիմնադրման պատմությունը ներկայաց-

ված է բազմաթիվ հետազոտողների աշխատություններում: Պիտի ասել, որ Ժ.Դեղեյանի մոտեցումները նոր լույսի տակ են քննում պատմագրության առջև կանգնած բոլոր խնդիրները: Հեղինակի համար կարևոր են բոլոր կարգի սկզբնաղբյուրները, սկսած տարալեզու մատենագրական հուշարձաններից մինչև կնիքներն ու ժառանգականության ցանկերը:

Երկրորդ գլուխը նվիրված է Թորոս Ա իշխանի (1100-1129) գործունեությանը (էջ 423-517): Ժ. Դեղեյանը համակողմանիորեն անգրագառնում է Թորոս Ա-ին միջնադարյան պատմագրության մեջ տրված անուներին ու տիտղոսներին, լատին իշխանությունների հետ նրա հաստատած ազգակցամոտեսական կապերին, իր եղբայր Լևոնի հետ Կիլիկիայի ղեկավարմանը, Դեսպոլի հաշտության պայմանագրին (1108 թ.) և տարածաշրջանում ունեցած նրա դերին, իշխանության նոր մայրաքաղաք դարձած Անավարդայի նշանակությանը, Կիլիկյան դաշտավայրի նվաճմանը, եկեղեցու կողմից սրբացված գորավարների պաշտամունքին, հայկական և խաչակրաց բանակների հատուկ ջոկատների կազմակերպությանը և զինվածությանը, ասպատակություններին ու պաշարման արվեստին, Ռուբինյան առաջին դրամների բնութագրմանը, վանական աշխույժ կյանքին, Անավարդայի եկեղեցու նշանակությանը, Կիլիկիայի գլխավոր իշխանական տան սրբություններին: Այնուհետև խոսվում է Թորոս Ռուբինյանի բյուզանդական կայսրությանը ենթակայության աստիճանի և նրա հետ փոխհարաբերությունների, ֆրանկյան լատին իշխանությունների հետ համագործակցության, Անտիոքի իշխանության գերակայության ճանաչման և նրա նվաճողական քաղաքականության դեմ պայքարի, Սելջուկյան պետությունների դեմ մղած պայքարի մասին:

Երրորդ գլուխը նվիրված է Լևոն Ա (1129-1137) իշխանի պետական քաղաքականության հետազոտությանը (էջ 523-637): Ժ. Դեղեյանը շարադրում է Թորոս Բ-ի մահից հետո իշխանությունը Լևոն Ա իշխանին անցնելու մոթ խնդիրը, թագ ընդունած Լևոնին՝ Միքայել Իտալիկոսի երկում թշնամաբար ներկայացնելու հանգ-

մանքները, Լևոնի ժառանգների խնդիրը, բյուզանդացիների պատժիչ ռազմարշավը (1137 թ.) և Լևոնի հետնորդների երկպառակությունը, հարևան պետությունների հետ հաստատված ամուսնական կապերը, զինվորական գործի զարգացումը Կիլիկիայի հայկական իշխանությունում, Անտիոքի դքսության, Եդեսիայի և Մարաշի կոմսությունների, Դանիշմանյան ամիրայության և Բյուզանդական կայսրության հետ ռազմաքաղաքական փոխհարաբերությունները, Հովհաննես Կոմնենոսի Կիլիկյան ռազմարշավի քաղաքական նախապատրաստությունը և արդյունքները: Հեղինակը փորձում է խորամուխ լինել այդ փոխհարաբերությունների բոլոր մանրուքների մեջ, որոնց մասին քիչ թե շատ վկայություններ են պահպանվել ժամանակաշրջանի պատմագրական հուշարձաններում: Հեղինակը փորձում է անկախ լինել իր եզրակացությունների մեջ և երբեմն շրջանցում է կարևոր երևույթներ: Այդ տեսանկյունից կարևոր ենք համարում Կիլիկիայի բյուզանդական դուքսերի գործունեությունը, որոնց անդրադարձը կոգներ վաղի ամբողջական պատկերացնել Կիլիկիայի նկատմամբ բյուզանդական հավակնությունների ողջ դաշտը:

Աշխատության երրորդ մասը նվիրված է Ժ-ԺԲ դդ. Կիլիկիայի, Ասորիքի, Պաղեստինի և Եգիպտոսի հայկական իշխանություններին, որոնք դտնվել են օտար տիրապետությունների տակ: Առաջին գլխում (էջ 647-704) հեղինակն անդրադառնում է կապադոկյան ավատատեր, հայազգի Սիմեոնի համագործակցությանը ինչպիսիք առաջին ռազմարշավի բանակների և նրանց ղեկավարների հետ, Լամբրոնի Հեթումյան տան սկզբնավորությանը, խաչակիր նորմանների և Բյուզանդիայի հետ փոխհարաբերություններին, 1112-1143 թթ. Հեթում Բ իշխանի ենթակայությանը Բյուզանդական կայսրությանը, Լամբրոնի Օշին Բ և Պապերոնի Սմբատ Ա Հեթումյանների գործունեությանը, Տարսոնի տեր Ասպետին և նրա ընտանիքին վերաբերող վկայություններին:

Երկրորդ գլուխն անվանված է «Հայերը Կիլիկիայի նվաճման բյուզանդական քա-

զաքականությանը դեմառդեմ» (էջ 711-755): Այստեղ հեղինակն անդրադառնում է Արևելքի նկատմամբ բյուզանդական ռադիկալ գործողությունների ընթացքում Կիլիկիայի նշանակությանը, 1140-1143 թթ. Հովհաննես Բ Կոմնենոսի ձեռնարկած երկրորդ Կիլիկյան ռազմարշավի պատճառների և ընթացքի վերլուծությանը: Հեղինակը քայլ առ քայլ հետևում է Բալկաններում և Կիլիկիայում տեղի ունեցած ժԱ գարի վերջի և ժԲ դարի առաջին կեսի հայ-բյուզանդական եկեղեցական բախումներին՝ քաղկեդոնական և հակաքաղկեդոնական հայկական համայնքների մերօրյա հետզոտությունների առաջադրած խնդիրների լույսի ներքո, ժԲ դարի առաջին կեսին Հայոց եկեղեցու առաջնորդների առջև կանգնած հիմնական հարցերին և գործունեության գնահատականին:

Երրորդ գլուխը կոչվում է «Հայերը և Ֆրանկները. աղերսներ, փոխհարաբերություններ» (էջ 761-815): Այս հատվածում հեղինակը հետազոտում է ժԲ դարի երկրորդ կեսի Կիլիկիայում խաչակրաց բռնատիրության բոլոր ժամանակաշրջաններին և տարածաշրջանի համար հայկական իշխանության պայքարին, հասարակական կարգավիճակը բնորոշող եվրոպական և տեղական ազնվականական տիտղոսների (բարոն, կոմս, մարկիզ, դուքս, միլ, իշխան) քննությանը, վասալական փոխհարաբերություններին, Հյուսիսային Ասորիքի և Կիլիկիայի դավանական իրավիճակին և հայ-լատին եկեղեցական փոխհարաբերություններին, խաչակիրների մղած Սուրբ պատերազմի գաղափարախոսությանը, լատին եկեղեցու նվիրապետական համակարգի նկատմամբ հայերի վերաբերմունքին, տարածաշրջանում վանական և գինվորական ասպետական կարգերի ներկայությունը, Եդեսիայի անկման դարաշրջանում կաթողիկոսարանի և պապության փոխհարաբերություններին:

Չորրորդ գլուխն անվանված է «Հայերը Ասորիքում, Պաղեստինում, Եդեսիայում» (էջ 819-926): Այստեղ ի մի են բերվում հայ բնակչությանն առնչվող և այս ժամանակաշրջանին վերաբերող պատմական վկայությունները, որոնք վերաբերում են Ամա-

նոսի լեռնային շրջանին, Անտիոքի իշխանության տարածքին, քաղաքային արիստոկրատիայի ներկայացուցիչ Ֆիրուզի էթնիկական ծագմանն ու գործունեությանը, անդրորոնտեսյան տարածքների (Ռուջ, Արտաշ, Հարիմ, Հալեպի շրջան) հայկական բնակչության դերին, խաչակրաց Հյուսիսային Ասորիքում և Սուրբ Երկրում հայերի ռազմական ներկայությունը, անտիոքյան բանակի ռազմական ինժեներ Ավետիքի, Երուսաղեմի հայկական գաղութի, Եդեսիայի կոմսությունից Երուսաղեմի թագավորություն հայերի գաղթին, Հալեպի մոտակայքում ինքնավար հայկական գորաշնկատի գոյությունը: Հեղինակն այնուհետև անդրադառնում է մուսուլմանական Հյուսիսային Ասորիքում հաստատված հայերի էթնոգրականության խմբերին (Յարուքթաշ եվնուխ, Արևորդիներ), որոնք հաստատված են եղել Շեյքարում, Համայում, Հավուսում: Հեղինակը նաև հատուկ քննարկման է արժանացնում Եդեսիայում ժԱ-ԺԲ դդ. հայազգի վեզիրներ՝ Բադր ալ-Ջամալի, Վահրամ Պահլավունու, Բանու Ռուզիկի, գործունեությունը:

Աշխատանքի չորրորդ մասը նվիրված է եփրատամերձ տարածքի հայկական իշխանություններին: Այստեղ առանձին գլուխ է նվիրված Մարաշի, Մելիտենեի և Եդեսիայի հայկական իշխանությունների պատմությանը (էջ 933-1051): Գլխում հեղինակը ներկայացնում է Հովհաննես Չալկիկի բյուզանդական վերանվաճումից հետո տարածաշրջանում ստեղծված իրադրությունը, Մարաշի ստրատեգիական դիրքի և Ֆիլաբետի իշխանության կազմում ունեցած դիրքի քննարկումը, խաչակրաց առաջին ռազմարշավից հետո Մարաշում բյուզանդացիների կողմից դուքս կարգված գորահրամանատար Թաթուլի խաչակիրների նկատմամբ առճակատումը, Դանիշմանյանների դեմ 1104 թ. պատերազմի հարցերը, Մելիտենեի իշխանության ազդային-կրոնական իրավիճակը, Գաբրիել իշխանի գործունեությունը, Դանիշմանյան ամիրայություն և լատին խաչակիրներին հետ փոխհարաբերությունները, Եդեսիայի բյուզանդական կառավարիչ Թորոսի ռազմաքաղաքական գործունեությունը (1094-1097):

երկրորդ գլխում պատմվում է մերձեկ-րատյան տարածաշրջանի մյուս հայկական իշխանությունների, հատկապես Գող Վասիլի և Բագրատի գործունեության (էջ 1057-1174) մասին: Այստեղ հեղինակն անդրադարձ է կատարում Գող Վասիլի Քեսու-նում ստեղծած իշխանության նախապատ-մությանը, իշխանական տիրույթներին, հարևաններին, ազգային և կրոնադավանա-կան խնդիրներին, հարևան պետություննե-րի հետ փոխհարաբերություններին:

Ժ. Դեդեյանը քննարկում է նաև ին-չակրաց առաջին արշավանքի պատմիչնե-րին քաջածանոթ, Գող Վասիլի եղբայր Բագրատի գործունեությունը, նրա փոխհա-րաբերությունները խաչակիր և սելջուկ գործիչների հետ: Պատմագրության համար մեծ հետաքրքրություն է ներկայացնում նաև տարածաշրջանի պատմության հետա-զոտությունը Գող Վասիլի մահից հետո, նրա իշխանության ժառանգորդներ Տղա Վասիլի իշխանության տարիներին (1114-1116):

Այս մասի երրորդ գլուխը հեղինակը նվիրել է տարածաշրջանի Պաշլավունի իշ-խանություններին և նրանց հարևաններին (էջ 1181-1325): Այստեղ հայագետ-բյուզան-դագետ-միջնադարագետ պատմաբանն անդրադառնում է Պաշլավունի նախարա-րական ընտանիքի ծագումնաբանությանը, Գրիգոր Մաղիստրոսի գործունեությանը, Բոգուեն Բոլոնիացու ստորականներ Թլպա-չարի Ֆեր և մերձեկրատյան Նիկոսուս իշ-խանների ճակատագրին, Ալ-Բիռայի տերեր Գուբոսի, Ապլղարի և Լիկոս Պաշլավունի-ների, Եդեսիայի կոմսության հպատակ մյուս հայ ստորականների (Կարկառի Կոս-տանդին և Դավթուկ Մամիկոնյանների, Միքայելի) վարքագծին: Եդեսիայի կոմ-սության անկումից առաջ և հետո Վասիլ Պաշլավունու (1136-1150) գործունեությանը Կարկառում, նրա հայազգի և լատին ստորականներին, Տլուքի Մովսիսի ամրոցի տի-րակալներին: Մովսիսի դղյակը դիտելով իբրև կաթողիկոսական նստավայր՝ հեղինակն անդրադառնում է Անի վերադառնալու խնդրին, քննարկում է Հռոմկլայի ամրո-ցում կաթողիկոսների հաստատվելու և մու-սուլմանական տիրապետության տակ

նրանց գործառույթի պատմագիտական խնդիրները: Այստեղ Ժ. Դեդեյանն առան-ձին բաժիններում խոսում է Վասիլ Պաշլա-վունու, Բանու Պողոսակի, Եդեսիայի կոմ-սության իշխանության տակ գործող հայ-կական գործողատի, Հյուսիսային Միջա-գետքի և Սասունի Թոռնիկյան հայկական իշխանությունների գործունեության մա-սին:

Ընդհանուր ամփոփումից հետո (էջ 1331-1338) հեղինակը բերում է հիմնական հապավումները, սկզբնաղբյուրների և գրա-կանության ցանկը (էջ 1331-1417), միջնա-դարյան հեղինակների և նրանց երկերի, անձնանունների, ֆեոդալական ընտանիք-ների և հարստությունների, ժողովուրդնե-րի, ցեղերի և էթնիկական խմբերի, տեղա-նունների ցանկերը (էջ 1419-1511): Բովան-դակությունից հետո բերվում են նկատված վրիպակները, Արծրունիների, Բագրատու-նիների, Պաշլավունիների, Ռուբինյանների տոհմաձագերը: Գրքի հետ պատրաստված է նաև տարածաշրջանը ներկայացնող չորս քարտեզ:

Ինչպես նկատվեց, Ժ.Դեդեյանի մենագ-րությունը Մերձավոր Արևելքի հայկական իշխանությունների պատմությունը ներկա-յացնում է համաշխարհային պատմության լայն հոսանքների վրա: Աշխատանքում լայնորեն օգտագործված են հայերեն, հու-նարեն, լատիներեն, ասորերեն և արաբերեն լեզուներով դրված մատենագրական հու-շարձանները: Իհարկե, նման խնդիր իրա-կանացինու ճանապարհին, ֆրանսիական պատմագրությունն անցել է բավական եր-կար հետազոտական ուղի: Արդեն Վիկտոր Լանդլուայի և Էդուարդ Դյուլորիի աշխա-տություններում առկա են այս շրջանի հա-յոց պատմության խնդիրների արծարծման հիմնական մոտեցումները, որոնց խորաց-մանն իր աշխատություններում նպաստել է Կլոդ Կահենը, որի հետևորդն է իրեն, ար-դարև, համարում Ժ. Դեդեյանը:

Ժ.Դեդեյանի հիմնական խնդիրն է ստեղծել ԺԱ-ԺԲ դդ. հայկական գիւնվորա-կան ուժերի տեղաբաշխման և տարածման պատկերը, միջազգային բյուզանդադի-տության և եվրոպական միջնադարագի-տության լույսի ներքո լուսաբանել տարա-

ծաղրջանի քաղաքական զարգացումների հիմնական ուղղությունները, միջնադարյան եվրոպայի և խաչակրության պատմության հետազոտություններին հետեւելով ցույց տալ հայկական իշխանությունների դերն ու կշիռը մերձավորարեւելյան քաղաքական համապատկերում: Հեղինակը գրքի զանազան հատվածներում հաճախ անդրադառնում է Մեծ Հայքից բնակչության արտագաղթի հարցերին, փորձում է սահմանել այն ծնող պատճառները, դրանց մեջ հատկապես մատնանշելով Բյուզանդական կայսրության ներքին քաղաքականությունը և սելջուկյան նվաճումները: Հեղինակը փորձում է վերականգնել քաղաքական և մշակութային այն կառույցները, որոնք թույլ էին տալիս հայկական ազգաբնակչությանը պետականության չգոյության պայմաններում առաջնորդել ժողովրդին, հետեւել Մերձավոր Արեւելքի տարբեր անկյուններում հաստատված գաղթականության կառույցների գործունեությունը: Այստեղ հեղինակի համար կարևոր նշանակություն է ստանում Հայոց եկեղեցու դերի ու նշանակության բացահայտումը՝ իբրև հայկական գաղութների գոյությունը կարգավորող ինստիտուտ:

Հեղինակը փորձում է նաև բացահայտել երևույթներ, որոնք այդքան հեշտ չեն ենթարկվում պատմագիտության որդեգրած կանոններին և իրենց մեջ ունեն բացառություն լինելու դրոշմ: Այս տեսանկյունից բնորոշ է, որ Ժ.Դեղեյանն ընդգծում է լատինացած, հունացած, արաբացված և թյուրքացած հայկական վերնախավի խաղացած գերը տարածաշրջանում: Նա հե-

տաքերի մեթոդաբանություն է կիրառում ճշտելու համար պատմական անձնավորությունների ծագումը (էջ 867-839): Հաճախ փորձում է ճշգրտել պատմագրության մեջ օգտագործվող եզրերը. օրինակ՝ Հալեպի աթաբեգությունն անվանում է թաղավորություն (տե՛ս էջ 871, 879): Գրքում քննարկված հարցերն այնքան բազմազան են, որ սահանջում են միջնադարագետների, արևելագետների, բյուզանդագետների և հայագետների նոր սերնդի կողմից ուղղորդված արժանացած հարցերի ու մոտեցումների ավելի կոնկրետ ու բազմակողմանի երևակումներ: Հայագիտության մեջ այս հետազոտությունն իր արժանի տեղը կարող է զբաղեցնել Նիկոզայոս Արոնցի «Հայաստանը Հուստինիանոսի դարաշրջանում» մենագրության կողքին, իբրև ԺԲ դարի Հայաստանի պատմությանը նվիրված բազմակողմանի հետազոտություն:

Ժ. Դեղեյանի գիրքը դրված է իր քննարկած հարցերին նվիրված սկզբնաղբյուրների լայն հենքի վրա, օգտագործված են հետազոտված հարցի շուրջ դրված գրքեր: Բոլոր լեզուներով հետազոտությունները: Հեղինակի հետաքրքրությունները քաղաքական պատմությանից նրան տարել են էթնիկական, դավանաբանական, եկեղեցադիտական, աշխարհադրական, կնքագիտական ժամանակակից հետազոտությունների բավական լայն ոլորտ: Հայագիտության համար չափազանց կարևորվում է ներկա աշխատանքի թարգմանությունը հայերեն: Նոր հաջողություններ մաղթենք Ժ. Դեղեյանին և սպասենք նրա իսկ ղեկավարած զպրոցի նոր հրատարակություններին:

ԱԶԱՏ ԲՈԶՈՅԱՆ